

Uorden

dalla Pleiv evangelica reformada Foppa

sebasond sigl art. 6 dalla Constituziun dalla baselgia cantunala,
approbau ils **xx.xx.xxxx** dalla radunonza generala

1. Disposiziuns generalas

Art. 1

¹ La Pleiv evangelica reformada Foppa sebas sin Deus e sigl Evangeli da Jesus Cristus cun sia forza liberonta e da muossavia. Ella resorta dalla Reformaziun e serenovescha cuntinuadamein tras il dialog vital cul plaid da Deus dalla bibla e dalla societad.

Basa

² Ella porta il messadi biblic en nies temps. Ella recepescha damondas e supplicas dils carstgauns ed assista quels alla tscherca da senn ed orientaziun.

Art. 2

La Pleiv evangelica reformada Foppa ei purtadra dalla veta ecclesiastica e procura per ina purschida corrispundenta. Ella ei responsabla per l'annunziaziun digl Evangeli tras survetschs divins, scolaziun, pastoraziun, diaconia e svilup dalla pleiv.

Incumbensa

Art. 3

La Pleiv evangelica reformada Foppa fa part dalla Baselgia evangelica reformada cantunala dil Grischun.

**Appartenenza
alla Baselgia
cantunala**

Art. 4

Appartenenza alla Regiun ecclesiastica

¹ La Pleiv evangelica reformada Foppa ei ina part dalla Regiun ecclesiastica Surselva.

² Ella deleghescha silmeins mintgamai in commember dalla pleiv e digl uffeci da pervenda alla radunonza regiunala. Aschinavon ch'ella ha tenor ils statuts dalla Regiun ecclesiastica il dretg sin ulteriurs mandats san commembers dalla suprastanza dalla pleiv, digl uffeci da pervenda ni dalla pleiv occupar quels.

³ La radunonza dalla pleiv elegia ils delegai per ina perioda d'uffeci da dus onns ed els ein reelegibels.

Art. 5

Appartenenza persunala

¹ Alla Pleiv evangelica reformada Foppa fa part mintga persuna cun domicil sin territori dallas vischnauncas politicas Ilanz/Glion (senza Schnaus), Lumnezia, Val S. Pieder, Breil/Brigels (mo Waltensburg/Vuorz ed Andiast) e Schluein,

- a) dalla quala ils geniturs han declarau l'appartenenza culla naschientscha ni tochen ch'ella ha cumplenu 16 onns;
- b) che pren domicil en vischnaunca sco commembra d'ina baselgia evangelica reformada;
- c) che declara alla suprastanza dalla pleiv sia entrada.

² La sortida dalla pleiv e dalla Baselgia cantunala succeda cun communicaziun a scret alla suprastanza dalla pleiv.

Art. 5a

Appartenenza senza domicil ella Pleiv

¹ Sin damonda sa la suprastanza dalla pleiv declarar l'appartenenza ad ulteriuras persunas, e quei els suandonts cass:

- a) persunas cun obligaziun da taglia limitada ella pleiv;
- b) commembers ch'ein setratgs naven dalla pleiv;
- c) commembers d'autoritads ed emploiai ni collaboraturs voluntaris dalla pleiv cun domicil ordeifer quella.

² L'appartenenza ei pusseivla a persunas cun domicil en Svizra che fan part d'ina baselgia commembra dalla Baseligia evangelica reformada dalla Svizra (BERS).

³ Per persunas commembras ein acts officials e celebrazions da benedicziun senza cuosts.

Art. 6

¹ Il dretg da votar e d'eleger han – independentamein da lur naziunalitad – tuttas commembras e tuts commembers che han cumpleniu il 16avel onn da naschienscha. L'elegibilitad entscheiva cu las persunas han cumpleniu il 18avel onn da naschienscha.

**Dretg da
votar e
d'eleger**

² Maximalmein ina collaboratura ni in collaboratur dalla pleiv sa vegnir elegida ni elegius ella suprastanza dalla pleiv sche siu pensum d'occupaziun survarga buca 10 pertschien.

³ Persunas appartenentas senza domicil ella Pleiv han il dretg da votar e d'eleger analog ad alinea 1.

Art. 7

¹ Ils organs dalla pleiv ein :

Organs

1. la totalitad da votantas e votants
2. la suprastanza dalla pleiv
3. gl'uffeci da pervenda
4. il revisurat

² Tenor basegns san ins fundar ulteriuras cumissiuns fixas ni limitadas.

Art. 8

¹ Tuttas commembras e tuts commembers dalla pleiv portan comunabla-mein la veta dalla baseligia, conform a lur pusseivladads, lur duns e lur scolaziun.

**Direcziun
comunabla
dalla pleiv**

² Ils commembers e las commembras dalla suprastanza dalla pleiv e digl uffeci da pervenda procuran pil svilup dalla pleiv e meinan quella comunabla-mein.

Art. 9

Cirquits dalla pleiv

Tenor basegns san ins classar la Pleiv evangelica reformada Foppa en cirquits dalla pleiv. Ils detagls leutier san vegnir reglai egl uorden da gestiun.

2. La radunonza dalla pleiv

Art. 10

Radunonza dalla pleiv ordinaria

¹ La radunonza dalla pleiv ordinaria ei mintg'onn la primavera per approbar il quen annual e gl'atun per approbar il preventiv e fixar il pei da taglia pigl onn vegnent.

² La suprastonza dalla pleiv decida il liug dalla radunonza.

³ Ils lungatgs officials ein romontsch e tudestg.

Art. 11

Radunonza dalla pleiv extraordinaria

¹ Ina radunonza dalla pleiv extraordinaria dat ei sche las fatschentas pretendan quei e la suprastonza dalla pleiv cloma ad ina tala.

² La radunonza sto s'entupar enteifer treis meins sche silmeins tschun per-tschien dallas votantas e dils votants pretendan quei a scret cun indicar il motiv dalla tractanda.

Art. 12

Convocaziun, preparativas, cumpetenza da decider

¹ Gl'invit alla radunonza dalla pleiv succeda cun indicar las tractandas e cun publicar quellas silmeins diesch gis ordavon el Fegl official/Amtsblatt Sur-selva.

² La suprastonza dalla pleiv ha da discutir ordavon tuttas fatschentas e da semtgar las propostas leutier. Tier fatschentas da pli gronda muntada redegia la suprastonza in messadi per mauns da votantas e votants e tar-metta, respectiv publichescha quel a maniera cunvegnenta.

³ Mintga radunonza dalla pleiv ch'ei vegnida clamada conform agl uorden ei cumpetenta da prender conclus.

Art. 13

La radunonza dalla pleiv ei responsabla per:

Cumpetenzas

1. relaschar e midar gl'orden dalla pleiv
2. relaschar, midar ed abolir las leschas
3. eleger ni buca pli eleger la presidenta/il president ed ulteriurs commembers dalla suprastonza dalla pleiv sco era eventualas suppleantas e suppleants
4. eleger il revisurat
5. eleger ils delegai per la radunonza regiunala dalla Regiun ecclesiastica
6. eleger ni buca reeleger plevonessas e plevons
7. approbar il rapport da gestiun dalla suprastonza dalla pleiv e digl uffeci pervenda
8. approbar il quen annual
9. fixar il pei da taglia ed approbar il preventiv
10. concluder pertuccont expensas che survargan il preventiv digl onn current
11. approbar il protocol dalla radunonza dalla pleiv
12. prender conclus davart fatschentas d'immobiglias
13. prender conclus pertuccond iniziativas dil pievel
14. prender conclus pertuccond l'appartenenza ad ina Regiun ecclesiastica
15. prender conclus davart la fusiun cun autras pleivs
16. far propostas per mauns dalla Regiun ecclesiastica ni dil Cussegl baselgia cantunal
17. ulteriuras incumbensas ch'ein attribuidas ad ella tras leschas dalla Baselgia cantunala
18. concluder davart fundar cumissiuns ed eleger ils commembers da quellas

19. prender conclus davart ulteriuras propostas che la suprastanza dalla pleiv presenta ad ella

Art. 14

Prender conclus

¹ Tier votaziuns ed elecziuns decida la majoritad dils presents. Cun egualitad dallas vuschs ei in project refusaus el cass da votaziuns, el cass d'elecziuns vegn tratg la sort.

² Sch'in commember dalla radunonza pretenda, ein votaziuns ed elecziuns da far a scret. Elecziuns a scret dat ei plinavon sche dapli personas candideschon pil diember da posts ch'ei d'occupar.

Art. 15

Dretg d'infor- maziun

¹ Alla radunonza dalla pleiv sa mintga persuna cun dretg da votar pretender sclariment davart ina fatschenta dalla pleiv, quei aschinavon che quei cunterfa buca alla lescha davart la protecziun da datas ni al dretg surordinau.

² Il sclariment ei da dar sil pli tard a caschun dalla proxima radunonza dalla pleiv.

³ Ei sa vegnir stuscha ni desistiu da dar sclariment sche interess relevants dalla pleiv ni da tiazas personas impedeschan quei.

Art. 16

Dretg da pro- postas

¹ Mintga persuna cul dretg da votar sa pretender ch'in object definiu vegni tractandaus per discutir surlunder. Ina tala proposta sto vegnir inoltrada a scret alla suprastanza tochen 30 gis avon la radunonza.

² Mintga persuna cul dretg da votar sa far durant la radunonza dalla pleiv ina proposta pertuccond in object ch'ei buca indicau silla gliesta da tractandas. Declara la radunonza tala proposta sco relevanta, ha la suprastanza dalla pleiv da dar sclariment per regla a caschun dalla proxima radunonza e dad eventualmein far ina proposta leutier. La votaziun davart la declaronza da relevanza suonda a caschun dalla proxima radunonza dalla pleiv. Durant la medema radunonza vegn votau davart la declaronza da relevanza sulettamein sche la radunonza declara cun ina majoritad da duas tiazas la proposta sco urgenta.

Art. 17

¹ 100 votantas e votants san pretender da tractar ina fatschenta ch'ei ella cumpetenza dalla radunonza dalla pleiv. L'iniziativa sa vegnir inoltrada en fuorma d'ina proposta generala ni d'in sboz elaborau.

**Iniziativas
dil pievel**

² Iniziativas illegalas declara la suprastonza dalla pleiv sco nunvaleivlas.

³ In project d'iniziativa ch'ei gartegiaus presenta la suprastonza dalla pleiv, ensemen cun sia posiziun ed eventualmein cun ina cunterproposta, enteifer nov meins alla radunonza dalla pleiv per schar votar surlunder.

3. La suprastonza dalla pleiv

Art. 18

¹ La suprastonza dalla pleiv secumpona da silmeins tschun commembers che la radunonza dalla pleiv elegia per ina perioda d'uffeci da dus onns. Suenter che lur perioda d'uffeci finescha san las persunas vegnir reelegidas.

Cumposiziun

² La radunonza dalla pleiv elegia il president resp. la presidenta. Pigl auter seconstituescha la suprastonza dalla pleiv sezza cun eleger in vicepresidente resp. vicepresidenta, in actuar resp. actuara ed in cassier resp. ina cassiera. Als ulteriurs commembers san incumbensas specialas vegnir surdadas.

³ Ils commembers dalla suprastonza repartan ils suandonts ressorts denter els: actuariat, finanzas, persunal, voluntaris, survetschs divins, scola, pastoraiziun, diaconia, baselgia mundiala, musica, communicaziun ed immobiglias.

⁴ La suprastonza dalla pleiv pren ses conclus sco autoritad collegiala.

⁵ In tochen dus commembers digl uffeci da pervenda ein representai cun vusch consultativa.

Art. 19

Convocaziun, cumpetenza da prender conclus

¹ La suprastanza dalla pleiv s'entaupa sin invit dalla presidenta ni dil president regularmein a sesidas. Sche la maioritad dils commembers pretenda quei sto medemamein vegnir clamau ad ina sesida.

² Ella ei habla da prender conclus sche la maioritad dils commembers ei presenta.

Art. 20

Cumpetenzas

¹ La suprastanza dalla pleiv ei gl'organ executiv. Ella promova la veta ecclesiastia. Alla suprastanza dalla pleiv ein tuttas fatschentas suttamessas ch'eiin buc attribuidas muort perscripziuns specialas ad in'otra autoritad.

² En special eis ella responsabla per:

1. executir ils decrets e conclus dalla pleiv
2. relaschar disposiziuns executivas sco era in uorden da gestiun
3. preparar las fatschentas sco era envidar alla radunonza dalla pleiv
4. preparar l'elecziun da plevons e plevonessas
5. organisar la substituziun el cass da posts vacants egl uffeci da pervenda
6. engaschar e relaschar ulteriuras collaboraturas e collaboraturs
7. reglar las relaziuns d'engaschament tenor las normas dalla Baselgia cantunala
8. promover il svilup dalla pleiv ed approbar purschidas ecclesiasticas, projects ed occurrenz
9. organisar l'instrucziun da religiun ella scola populara
10. organisar l'instrucziun dils confirmands e dallas confirmandas e prender, en cass da dubis, conclus pertuccond l'admissiun alla Confirmaziun
11. fixar las collectas, aschinavon che quellas ein buca decretadas dalla Baselgia cantunala
12. menar ed assister las collaboraturas ed ils collaboraturs ed ils voluntaris elegi
13. administrar las finanzas e la facultad dalla pleiv

14. decider davart expensas finanzialas unicas tochen 10'000 francs e repetitivas tochen 5'000 francs
15. haver quita da baghetgs ed immobiglias
16. menar gl'archiv dalla pleiv
17. collaborar enten exequir ils decrets e conclus dalla Baselia cantunala
18. representar la pleiv encunter anora
19. garantir la circulaziun dallas informaziuns denter pleiv e Regiun ecclesiastica
20. far propostas per mauns dalla Regiun ecclesiastica ni il Cussegl baselia cantunal

4. Gl'uffeci da pervenda

Art. 21

¹ Digl uffeci da pervenda fan tuttas plevonessas e diaconas sco era tuts plevons e diacons socials dalla Pleiv evangelica reformada Foppa part. **Incumbensa**

² Ils commembers digl uffeci da pervenda exequeschan lur uffeci en survetsch dalla pleiv ed adempleschan lur incumbensa en annunziaziun, scolaziun, pastoraziun, diaconia e svilup dalla pleiv sebasond silla Constituziun dalla pleiv ed enteifer las disposiziuns legalas. Ellas ed els collavuran culla suprastanza dalla pleiv e las ulteriuras collaboraturas e ils ulteriurs collaboraturs.

³ Gl'uffeci da pervenda s'organisescha sez. Davart ils conclus meina el in protocol.

⁴ Gl'uffeci da pervenda deleghescha in tochen dus commembers allas sesidas dalla suprastanza dalla pleiv.

5. Il revisurat

Art. 22

¹ Il revisurat secumpona da silmeins duas revisuras resp. dus revisurs. La radunonza dalla pleiv elegia quellas persunas per ina perioda d'uffeci da dus onns. Els san vegnir reelegi. **Cumposiziun, incumbensa**

² El controllescha l'entira contabilitad dalla pleiv, dat giu mintg'onnn in rapport e fa la proposta corrispundenta alla suprastanza ed alla radunanza dalla pleiv. Per assistenza e sustegn sa ella clamar, en entelgientscha culla suprastanza, in post specialisau extern.

³ Ils organs e las collaboraturas ed ils collaboraturs dalla pleiv ein obligai da dar sclariment al revisurat e dar investa els protocols dallas sesidas per che quel sappi ademplir sias incumbensas. Las disposiziuns davart il secret d'uffeci ni professiunal e la liberaziun da tal restan resalvadas.

6. Ulteriur persunal

Art. 23

Emploiai, voluntaris

¹ La suprastanza dalla pleiv sa engaschar ulteriuras collaboraturas e ulteriurs collaboraturs sco era nominar voluntaris. Quellas persunas han las habilitads persunalas e specialas ch'ei drova per ademplir lur lavur.

² Cundiziuns d'engaschament ed incumbensas vegnan fixadas a scret en contracts da lavur. Quellas sedrezzan tenor il dretg dalla Baselpia cantunala.

7. Immobiglias

Art. 24

Affittaziun d'immobiglias e schischom

¹ Cun affittar sias immobiglias e siu schischom riguarda la pleiv interessentas ed interessents tenor la suandonta successiun:

1. emploiadas ed emploiai dalla Pleiv Foppa
2. commembras e commembers dalla Pleiv evangelica reformada Foppa el liug digl object
3. ulteriuras commembras e commembers dalla Pleiv evangelica reformada Foppa
4. habitontas e habitonts dalla vischnaunca politica el liug digl object
5. tut las autras persunas

² Pertuccont l'affittaziun da terren agricol vala la successiun indicada naven da cefra 2 aschinavon che quei ei en concordanza cul dretg surordinau.

8. Finanzas

Art. 25

¹ La pleiv sefinanziescha en special cun:

Finanziaziun

1. entradas da taglia
2. entradas dalla facultad
3. donaziuns, legats e contribuziuns da tiarzas persunas
4. contribuziuns dall'ulivaziun da finanzas
5. contribuziuns dalla Basalgia cantunala

² L'administraziun succeda tenor ils principis dalla legalitad, digl equilibr e dall'efficienza.

³ La pleiv incassescha taglias tenor las normas dil dretg cantunal. Ella relai ina lescha da taglia.

9. Disposiziuns finalas e transitoricas

Art. 26

**Entrada en
vigur**

¹ Quest uorden dalla pleiv entra en vigur igl 1. da schaner 2027 suenter che la radunonza dalla pleiv ed il Cussegl da baselgia cantunal han approbau tal.

² Sin quest termin vegnan ils uordens dallas pleivs anteriuras aboli.

El num dalla Pleiv evangelica reformada Foppa

la presidenta / il president

l'actuara / gl'actuar

Approbau dil Cussegl da baselgia cantunal ils **xx.xx.xxxx**

la presidenta / il president

l'actuara / gl'actuar
